

RETORICHIS DAI PRINS DI NOVEMBAR: SI TORNIAL A CJARIÂ LA SUSTE?

Ancje cheste e je passade! Ogni an, ai prins di Novembar (e zà agns si tacave cul 28 di Otubar e si rivave fintremai a San Martin) e capite une bugade di patriotiche liturgjie, indulà che tancj di lôr a rivin adore di disbotonâsi la bardele e il gjilè, spiegant al popul par ce cont che a son muarts i muarts e ce che a àn dit in chel moment che ur è scjampât l'ultin flât. Parcè che la nazion no si contente di vê vût il lôr sanc: e vûl ancje sfrutâ la lôr memorie e la lôr sepulture par chê propagande gladiatorie che in Italie nissun rivarà mai a dislidrisâ.

E chest an il cerimoniâl al è stât plui nudrît e plui cjalt dal solit: cence vê iniment ni manariis ni lovis, i galopins di Rome a son lâts atôr sdrondenant dute la retoriche ferace che nus à sturnîts par vincj agns a lunc e i gjornâi ur àn fat revoc. Si viôt che une vore di int e crôt in mò ae fuarce magjiche di chê musiche alì. E vadì che no àn tuart, parcè che il talian al è bon ancje di strenzi la cinturie, baste che al puedi slargjâ la orele ai sermons sflandorôs e plens di fusetis e di mitologjiis. Ma cheste slavinade di cjacaris sboentadis no nase di bon: ca si cîr di tornâ a cjariâ la suste!

Fin che si lei su pai sfueis lis storiis de Coree o de Indocine, si po ancje alçâ lis spalîs; a son robis avonde lontanis. Ma cuant che, par dut il paîs, si tache a puartâ atôr bandieris o ghirlandis di orâr, a tontonâ di glorie e di "urne dei forti" e trombetâ la liriche strassameade di A. Mario o di Mameli, al pâr di sintî odôr di burlaç. E noaltris furlans o vin imparât par lungje esperience che, ogni volte che si inmanee un di chei burlaçs la prime scraveçade di tampieste e je par nô. Baste, Bastian...

Ma e sarès ancje ore che i parons dal vapôr la finissin di vignî a scuziânus la talianitât nome cuant che ur passe pe vite un sgrisul di fufe; e dopo dismenteâsi, a pene passade la burascje, che di ca des monts al è ancje un Friûl. O vin capît aromai: noaltris lis sentinelis, il baluart, l'antemurâl e vie indenant: e i miliarts pe ricostruzion, pe disocupazion, pal svilup industriâl, pe redenzion agrarie, ai sflaçjons, ai camoriscj ai bogns di nuie di altris lûcs. Ocjo, siôrs, che l'orâr no si cuince in salate, e cu lis bandieris no si parisi dal frêt e cui cjants nazonâi no si implenisi il stomi. Se Rome e vûl tirâ sù i sfueis, al sarà miôr che e mudi sunade!

josef marchet - Patrie dal Friûl / Novembar 1950